

Mi ta manece anochi wakyendo futuro di mañan

Nos a pasa den e festivalnan di **"Un Canto pa Aruba su Himno y Bandera."**

Festivalnan, tanto di muchanan como di e adultonan cu tabata di un nivel hopi halto.

Locual mi a nota den varios di e composicionnan - ganador di e un di e 10 premionan - ta cu tabatin cancionnan ganador cu no tabatin nada di himno y bandera den nan.

Tambe mi a nota composicionnan cu no tabata cuadra cu conocimiento di nos Papiamento.

Mi tin cu bisa aki cu mi mestin hopi di siña di nos papiamento ainda. Varios composicion ta menciona himno of bandera un biaha den e palabranan, pero si scucha bon e ta dedica na completamente otro topico.

E tema canta no ta nada tocante e himno ni bandera.

Un cancion ta cuminsa na splica: **"Biba nos cultura y nos tradicion. Nos cultura ta bunita y no tin comparacion.."** y despues no ta tende nada mas di e cultura y e tradicion a cuminsa na splica.

Ta menciona cu **"mi ta cu mi bandera parti di nos nacion y mi ta desea pa bo zwaay e hunto cu nos"**.

Ta menciona cu **"Mo Michi a prepara pa pone instrumentonan cla"** y seguidamente ta menciona e wiri, tambu y mandolin, pero **"e cultura y nos tradicion"** di comienzo no ta splica.

Pues, e contenido a varia di e introduccion.

Un otro cancion den su introduccion ta bisa: **"Escudo y un bandera ta muestra e pais su identidad...Nos tin di duna nan balor bibando tur ora den hermandad"**.

Despues di esey no ta splica nada mas di bandera ni escudo. Ta den e coro/pregon ta bini dilanti e frase: **"Nos escudo y nos bandera (coro: di nos e ta).."** Ningun caminda ta splica den kico e ta muestra e pais su identidad.

Velushka Krozendijk nr. Dos den categoria 14 pa 17 aña na Centro di Barrio Tanki Leendert a canta: **"Yega na bo meta"**.

Un cancion cu no tabata tin nada di himno ni bandera, pero cu contenido completo pa su titulo y tema.

Un composicion cu un tema educativo cu ta ponebo kita sombre pa su compositor.

Un cancion cu mester wordo toca na emisoranan no un biaha pero diez biaha pa dia.

E cancion ganador di **Mitchell Tromp** no tabata tin himno ni bandera den dje tampoco.

E compositor **Edselyn Figaroa** a dune aki un composicion completo cu contenido real y cu un mensahe maraviyoso pa nos hendenan;

"Ainda no ta laat pa cambia nos mentalidad".

E di 3 lugar di muchanan di 10 pa 13 aña **Juemy Hernandez** tambe tabatin un composicion di **Edselyn Figaroa** y completo.

Un hoben relatando cu **"si mi tabata....."** mencionando diferente profesion y cu e lo haci esaki..... pasobra; **"Aruba su futuro ta den nos man"**, **"Aruba su futuro ta depende di nos muchanan"**.

Por a nota e aña aki cerca e muchanan y cerca e adultonan e progreso cu a ser haci den composicion di cancionnan y cu ta tene cuenta hopi tambe cu e Papiamento di e composicionnan aki.

Pa e tipo di festivalnan, ta cantantenan cu nivel halto di canto ta yega e final cu composicionnan di calidad y nivel.

Cantantenan cu mester sa nan lugar y con ta expresa na e publico si bo ta papia.

Como cu **Papiamento** ta un tema importante di e festival aki, e cantante mester sa tambe kico e ta expresa y trata na expresa un Papiamento acceptable.

Nada di **"mi ta wakyendo"** of cu mester pidi **"time ball"**.

Tin temanan cu ta ponebo pensa.

Mi ta corda con mi a bisa un persona na Tanki Leendert: stop di usa **"nos futuro di mañan"**.

Nos no tin tampoco; **"nos pasado di ayera"**.

Mi a scucha un bunita cancion, pero e ta menciona keto bay e **"manece mainta"**.

Mi no tabata sa cu mi por **"manece anochi"** tambe.

Compositornan mester tene cuenta cu formulacion di nan frasenan na Papiamento.

Un otro composicion ta menciona cu **"ta falta pa Papiamento bira idioma oficial"**.

Papiamento a bira idioma oficial hopi aña pasa caba.

Otro cantante ta menciona cu mensahe di Betico Croes d.f.m. ta: **"no puntra kico bo pais por haci pa bo. Puntra kico abo por haci pa bo pais"**.

Esaki ta un cancion cu mi no por toca pa mi yiu y nieta pasobra e ta educa nan robey.

E frase aki no a bini di Sr. Betico Croes, pero ta palabranan di president John F. Kennedy for di principio di decada 60 di siglo pasa.

Tin hende cu lo no keda contento cu loke mi a skirbi aki, pero mester haci esaki.

Si no muestra riba e cosnan aki, nan lo sigui y na lugar di mehora, pio lo keda bira.

Juby Naar